



*Sainct Pierre & Sainct Iean vont au tombeau
de Iesus.*

SIMON Pierre & l'autre Disciple qu'aymoit Iesus ayans esté aduertis par Marie Magdeleine, vinrent au sepulchre ; & l'autre Disciple courut plus fort qu'é Pierre, & vint le premier au sepulchre ; & s'estant baissé vid les linges mis à part, toutesfois n'y entra point. Adonc Simon Pierre vint le suiuant, & entra au monument, & vid les linges dont Iesus auoit esté enseuely, mis de costé, & le coure-chef qui auoit esté mis sur le chef de Iesus, non pas mis avec lesdits linges, mais enuelopé à part en son lieu : Lors donc l'autre Disciple aussi y entra, lequel estoit venu le premier au sepulchre, & le vid, & creut : car ils ne connoissoient pas encore l'Escriture, qu'il falloit que Iesus ressuscitast des morts : & les Disciples s'en retournerent derechef chez eux, avec grand esbahissement des choses qu'ils auoient veuës.